

## **Radyo an Norvys**

(<http://www.dasunys.net/podcast.htm>)

**Titel:** Nowodhow an seythen (18/03/08)

**Auctour:** Matthew Clarke

**Dydh:** 18 Meurth 2008

**Pesyans:** 5:01

Moy es kans person eth dhe Bennseythen Gernewek Kowethas an Yeth an bennseythen yw passyes.

An hwarvos veu synsys dhe Loja Tewesek Yn Tewyn Pleustri... an kynsa prys yn termyn hir mayth esa yn Ostel.

Warlergh... ogas ha pub onan a leveris y vos an gwella bythkweyth ... ha my a yll unnverhe gans henna.

Ordenys veu dre vras gans Koreen Twydell...

<>

Ha heb mar res yw dhymm aswon gweres Polin Prys ha Loveday Jenkin ynwedh.

Leun a hwarvosow o... gans arethow meur a les gans Rod Lyon, neb a arethas a-dro dhe byskessa, Ben Bruch neb a gewsis a-dro dh'y hwithransow Treger... ha Ken George awos y areth a-dro dhe Edward Llwyd...

<>

Chons o keffrys synsi areth dhe vagas bras a Gernewegoryon war an destenn a vri... an Furv Skrifys Savonek. Henn o gonis a Ben Bruch hag Albert Bock, gans govynnadow awosa.

Byttegyns, nyns o hwarvos sygh gans dyskas wosa dyskas.

Yth esa keskan veur dy Sadorn y'n nos gans pyba... hag ow band Skwardya... ha gans sedhegow dhe les erel... kepar ha'n huni gwrys gans Polin Prys.

Hi a ros testennow arbennik dhe lies bagas, ha res o dhedha dadhla an kas. Nebes o didhanus fest... kepar ha'n huni ma...

<>

Hwi a glewas Jori Ansell ha Pol Hodge ena.

Wosa pub tra dhe worfenna, an diwettha sedhek a glywas tybyansow a bub huni esa gesys... hag y hevel bos hwans a dhehweles dhe'n kethsam tyller arta y'n vledhen a dheu.

\*!\*!\*

Y'n rygbi...

Pennseythen dha o rag Rysrudh... I a fethas Halifax etek-poynt-warn-ugens dhe dri foynt. Hemma a wra dhedha yn-mes an le 'kodha'... hag y fydhons ow pesya yn Kenedhlek Onan y'n seson nessa.

Nyns esa gwariow gans parys Kenedhlek Onan, ytho rydh o dhe'n Vorladron ha'n Oll-Duyon.

Byttegyns yth esa derbi bras ynter Kernow ha Dewnans.

Dewnans a waynyas warlyna, ytho yth esa edhom bras dhe'n Gernowyon daskavos an piwas... ha henna o an pyth a wrussens i.

Kernow a dryghas deg poynt dhe seyth.

Y fydh agan para ni ow talleth aga haskyrgh Skoos Kontethek dalleth mis Me.

\*!\*!\*

Ha henn yw oll rag an seythen ma... bys y'n nessa prys... agas gweles.